

stehen/ auff den Morgen nim das Fell/ vnd thue es in den Kessel/ laß es den ganzen Tag stehen / biß inn die Nacht / darnach nim das Fell heraus/ vnd krümme es mit dem Stecken/ wie oben gemeldet / nim darnach Stein Alaun/ drey oder vier Unzen/ stoß es/ vnd temperir es mit warmen Wasser / aber nicht siedent heiß / vnd das gemeldte Wasser thue in eine Schüssel/ oder Becken/ thue das Fell wider rein/ vnd rühre es wol vmb/ mit den Händen 3. mal/ vnd wenn das Wasser kalt wird/ so werme es wider auff/ vnd diß thue wie vor gesagt/ zu drey malen / nim darnach aus dem Brodt das teige so klein als eine halbe Waldnuß groß/ vnd ein wenig Salz/ vnd Eyerklar/ oder weniger/ als dich selbst bedüncket/ alle diese Dinge ihue in das vorgemelte Wasser/ vnd mache es wider warm/ vnd laß im vorgedachtem Wasser wider eine Nacht stehen/ vnd nim es am Morgen wider heraus / vnd laß es trucken werden am schatten / darnach nims wider heraus / thue es zusammen / vnd wenn du es weiß machen willst/ so nim ein Kürschners Eisen/ vnd thue es auff die Erden/ vnd führe das Fell oben durch sehr wol/ streich es fein mit der Hand/ so wird es gemacht. Wilt du aber ein Fell bereiten/ daß die Haare oder Wolle darauff bleibet/ thue ihm also/ vnd bereite es als ein Sähemisch Fell/ außgenommen/ daß man die calcina nicht darzu brauchet.

Eine gar schnellere rohe Bereitung.

Laß das Fell einweichen/ wasche es/ vnd laß es am schatten trucken/ an einer Stangen/ wasche es mit Weinessig / schabe vnd streich es auff den Ort gegen das Fleisch / nim darnach gestossen Rostmeel/ oder Bärnzwiefel/ wirff es darauff/ vnd wickele es in ein naß Tuch/ laß es eine Nacht stehen/ oder lenger/ strecke es darnach/ vnd laß es trucken werden/ schabe es/ wie oben gemeldet/ so wirds gemacht.

Daß das Leder/ wenn man es schmieret nicht wider hart werde.

Zehen Pfund Walwurz in ein Eymmer Wasser / das halbe Theil eingesoffen Leder damit geschmieret/ wird nicht wider hart.

Solget